

四庫全書

集部

欽定四庫全書

集部

後周文紀卷七

詳校官中書

臣朱文翰

主事銜

臣徐以坤覆勘

總校官進士

臣楊懋珩

校對官原任典簿

臣郭祚熾

謄錄監生

臣胡騰蛟

欽定四庫全書

後周文紀卷七

明 梅鼎祚 編

庾信

四

周大將軍襄城公鄭偉墓誌銘

公諱偉字子直滎陽開封人也周宣母弟就封於鄭河
洛之地即有民人號鄭之君非無郡邑其後蛇鬪於門
龜當於鼎韓侵負秦晉滅陽城其祀忽諸以國為氏祖
徹撫軍贈濟州刺史父先護驃騎大將軍儀同三司襄

城郡公青州刺史永安中洛城晝掩黃河凌合翟泉會盟之地蒼鳥忽飛武庫兵欄之中鱗魚遂上三師北綫五馬南浮梁武帝大造中原樹君伊洛公之憑軾棧車言歸舊壤起為通直散騎侍郎天厭魏德政在強臣公耻入亂階乃於陳留起義太祖封函谷而待諸侯坐鄴宮而朝羣后威懷是接席捲西飛大統三年入朝蒙授武陽縣開國伯食邑六百戶尋除龍驤將軍北徐州刺史開河橋之陳解玉壁之圍張旃於富平被練於伊闕

探虎穴而揮戈上魚門而懸胄故以策名司勲功高舍
爵魏將侯景狼顧荆河天子命我偏師赴接垂餌虎口
中途背盟事獲交綏公之力也除中軍將軍散騎常侍
大都督襲襄城郡公食邑二千戶仍除使持節車騎大
將軍儀同三司餘如故遷驃騎大將軍開府加侍郎常
伯位重霍去病之登朝上將官尊公孫敖之出塞以今
方昔異代同榮魏後二年授大將軍事江陵防主都督
十五州諸軍事吳兵教士臚舳習流島嶼憑陵波瀾衝

激公暫臨江界已悉南越之兵裁汎樓船即善昆彌之戰遂得安歌澧浦弭節泮陽留魯侯而宴章臺對齊人而畋雲夢周保定元年授使持節都督宜州諸軍事宜州刺史天和六年授都督華州刺史餘如故嶠函重嶂汧渭分流陽陵之盜既奔華陰之學還聚而消渴連年屢有相如之患至於大漸遂如范增之疾桐君對藥分闕神明李柱侍醫更無方便以天和六年四月十七日薨年五十七詔贈本官加少傅都督司豫洛相冀五州

諸軍事司州刺史謚曰肅公禮也天子輟朝彌深大臣之議羣公會葬咸得同盟之禮夫人李氏頓丘貴姓卿相之門賢才之室霜露先侵策封郊次以其年十一月六日合葬於咸陽之長安縣某原合葬非古既異三王之前死則同穴還同六載之始雖復銜珠兩鶴同歸紫蓋之松出匣雙龍共沒延平之水嗚呼哀哉乃為銘曰國有巖邑朝多君子武公莊公平王卿士溫麥渝盟祔田廢祀驂乘停輿來朝識履惟祖惟考既侯既公樞機

周密出納清通治繁政簡處亂心雄濟河遺惠海岱餘
封世濟其美載誕其器忠無不為孝則不匱幽冀紛梗
闕河鼎沸自北自南聲聞梁魏揚旌汝潁威震三川擁
旄江漢席捲樓船成臯塵起廣武烽燃麋興麗箭鴈落
驚弦摠衛蘭錡申威河外山類鼓樓樹如車蓋都護兩
道將軍獨拜梧桐茂苑楊柳倡家千金回雪百日流霞
凋零倏忽悽愴榮華河陽古樹金谷殘花隴昏雲暝山
深路晚風氣纔高松聲即遠疇昔親友懽愉交結不為

平生應為此別

祖徹撫軍周書北史並作祖思明直閣將軍旂一作旂

周驃騎大將軍開府侯莫陳道生墓誌銘

君諱道生字某朔州武川人也本系陰山出自國族降
及於魏在秦作劉父少興武川鎮將山河抗拒關塞被
邊早擅威聲咸多雄烈君子讀書馬上清談劒端獨運
六奇專精三畧雖復身居末將而勇冠旌門位在支軍
而謀叅幕府魏正光五年任統軍隸天柱爾朱榮征北
海王永安三年隨太師賀拔勝入關尋轉別將滑源卷

甲關城東馬並皆克捷君有力焉永熙三年補都督太祖文皇帝奄有關河令行天下以君幹畧委之爪牙名洽中涓功叅上造兵臨河曲前登白馬之津寇發蒲城先戰黃沙之苑臨晉橫船既禽趙將馬陵削樹復下齊兵班瑞司勲披圖䟽爵授驃騎大將軍金紫光祿大夫鄆縣開國公食邑五百趙儼之為驃騎正駕單車張堪之拜光祿長乘白馬以斯連類朝野榮之大統九年更姓侯莫陳氏隨大將軍拓跋遠經始陽二水長鬪三川

無市擐甲構病死於轅門春秋五十一贈持節都督朔
州刺史君在武川文皇帝同鄉里霸功既立王業克成
不忘捨講猶論僨博今嗣德惟新功臣追遠東都馬鳴
不無見日之歎北陵車過終憶平生之言有詔更贈使
持節驃騎大將軍開府儀同三司都督宜敷絳三州諸
軍事敷州刺史謚某公禮也夫人拓跋氏安邑郡夫人
庭有鐘鼓家承箴誡教容教德言告言歸天和五年六
月薨即以其年十月同葬於京兆某縣洪源鄉武子成

寢請西階而合塋平陽下嫁即廬山而共墳銘曰

凝陰遠寂廣漠平寒沙窮翰海地盡臯蘭塞鴻秋去稠
桑夏乾風土壯氣山河凜然師旅上谷威雄武川君則
繼踵代不乏賢匣有忠劒庭流孝泉魏室多故餘風未
殄天保護德當塗廢典上將指蹤中涓力展洛城夜捷
河梁朝剪鐵劒金龜榮追玉鉉身胄漢祚門承魏緒並
擅華宗俱稱當路伉儷云匹年齡並故趙瑟秦聲同為
丘墓小陵石柳洪源鄉泉芻靈兩引池柳雙前隧路仍

合松城即連霜隨柳白月逐墳圓芝蘭幾代陵谷何年

周車騎大將軍贈小司空宇文顯墓誌銘

公諱顯字某上黨武鄉人也自大霧浮河長虹映渚承
源於若水纂系於蒼林上黨居韓之西常山在趙之北
因地為氏可畧而言焉祖求南衛將軍冀州刺史父金
殿征南將軍定州刺史並控鶴兵俱張戎樂聲榮之盛
繼踵當年公稟山嶽之靈擅風雲之氣容止矜莊聲名
籍甚彎弧挽強左右馳射故得名高上谷威振樓煩襲

爵安吉縣侯食邑五百戶永興三年幽并叛渙有無君之心帝顧謂公曰天下洶洶將若之何公曰擇善而從之乃誦詩云彼美人兮西方之人兮帝曰是吾心也乃定入關之策以公母老家大令預為計公曰今日之事忠孝不並君不密則失臣臣不密則失身帝愴然改容曰卿是我王陵遷朱衣直閣閣內大都督改封長廣縣公邑一千五百戶武帝初至潼關太祖親迎溱水太祖素知公名而未之識也目於衆疑而不問直云令此人射

水傍小鳥應手即著太祖喜云我知卿名矣即用為帳
內都督滄州諸軍事滄州刺史增邑并前二千五百戶
黃公衡之決事魏后是以推心潘承明之忠壯吳王為
之盡禮異代同榮見之今日東夏邊隅地連荒服井陘
塞道飛狐路斷乃以公為使持節衛將軍都督東夏州
諸軍事東夏州刺史白波青犢之兵銅馬金繩之亂莫
不交臂屈膝牽羊抱馬在州遘疾解任還朝小馬留廐
餘牀掛壁吏人攀戀刊石陘山雖非漢陽之城還似扶

風之路授使持節車騎大將軍開府儀同三司加散騎
常侍以魏後元年疾甚亡于同州春秋五十七天子輟
樂羣公會喪太祖親臨弔祭哀慟左右于時兵革交侵
普斷贈諡即以本官印綬權塋于同州之北山今建德
二年二月二十三日遷葬于咸陽長安縣之洪瀆原時
逢禮樂之遷代屬謳歌之變國雖異政人足追榮乃贈
使持節驃騎大將軍開府儀同三司小司空丹延綏三
州諸軍事延州刺史謚某公禮也夫人高氏渤海人也

柔叅晉政拒曹爽之異謀起在漢庭共王陵而俱對況
乎箴訓有儀言容以德肅恭中興賢才內則豈直不聽
雜樂以變齊國之風不食鮮禽以斷荆王之獵昔之命
塋季武子之西寢今之同穴長平侯之北陵世子神舉
兄弟至性純孝善居喪禮有終有始於身無改是以官
成名立孝顯忠貞銘曰

北岳二名葱河兩本其峻惟極其源惟遠俗稟山川人
資台衮義烈桓桓才雄悃悃乃祖乃父繼踵威雄擬金

北陸鳴玉南宮隱若吳漢賢哉竇融負霜依德無雷向
風挺此含章生茲秉德孝實天性忠為人則暢轂鏤膺
燕南趙北若水將通九部可勒帷幄叅謀宮闈典職善
擇忠言能防變色繁弱已勁淇園乃直戟中小支禽穿
左翼建旗赤谷揮戈武州長城萬里河水雙流潁川多
恙淮水未瘳義重穿壁恩深置郵于谷之口于渭之陽
丘山零落碑闕低昂草銜秋火樹抱春霜書劒俱沒人
琴並亡哀哀嗣子純心靡託孝水未枯悲松先落室進

巢雋門通弔盾功臣身殞會圖麟閣

周大將軍琅瑯莊公司馬裔墓誌銘

公諱裔字遵亂河內溫人也南正司天北正司地是謂
羲和之官即嗣重黎之政印之歸楚與章邯而並封豫
之避秦共毛公而俱去祖金龍仍居選部水鏡三臺父悅
再牧荆河威風千里而身遭禍機遂為季布所哭獲存
遺嗣實賴程嬰之忠國家追念功臣更撫叔教之子言
思官族還求女齊之盾公始應辟為河內功曹除員外

郎常侍汲郡治兵黃河浮馬推鋒輒闕之捷逐北長城
之陣授平東將軍北徐州刺史柳泉風塵三城席捲棠
陰鋒鏑千室入關遷車騎大將軍儀同三司開國龍門
縣伯仍除巴州刺史雖復巴水三迴夷歌數曲徒逢白
竹之弩已濟青衣之功朝廷以漢之功臣須開上將之
府晉之代胄宜紹琅琊之國遷驃騎大將軍開府改封
琅琊公食邑一千五百戶宮闈近密寔俟忠貞詔為大
御伯仍除大御正職司常伯任揔夔龍王道既平絲言

惟允尋除始州刺史都督始州諸軍事蠻夷恃險狼顧
鴟張高山尋雲深谷無景九地縱橫三門起伏峰危馬
束水險橋飛遂得谷靜山空冰消霧散仍為信州刺史
都督信州諸軍事精兵守於白帝足懼巴州之城船秭
下於荊州彌動西陵之戍即授使持節大將軍都督西
寧州諸軍事西寧州刺史將啓北戶之人向通南雲之
國聞寵若驚奄從深夜天和六年正月十八日亡春秋
六十五詔贈本官加懷邵邠晉四州刺史諡莊公禮也

以建德元年七月十三日塋于武功郡之三疇原公愛
敬純深有隱無犯忠貞亮直知無不為在我四十二年
身經六十九戰至于多竈唱籌並得成功飛沙擁石未
嘗乖律恂恂教義吳起西河之風閑閑鼓旗李牧長平
之政身死之日家無餘財山木所資一由詔塋有始有
卒生榮死哀銘曰

祝融是命重黎克舉公族乃建天官即序避世於秦承
家於楚金行失馭玉鏡淪輝我之烈祖識變乘機黃旗

東沒青蓋西飛落星置道長州出圍及我皇父荆河再
撫世屬喪亂身沒猾豎嗟我遺嗣崎嶇趙武寒覆鳥翼
飢吞獸乳獲歸河內更襲琅琊年方小馬怨結長蛇藏
兵九地置劔千家雪山埋馬冰河陷車既乃班政超然
榮守朱鷺頻飛金龜轉紐築塞長榆營車高柳玉案推
食河橋勸酒石門冰釋金隄電散蘆水門闕茅津成觀
馭風逸翮脩途始半建武功臣先悲吳漢沈寥搖落游
揚浸微金城路斷郿塢人稀風松雲蓋白水山衣賢已

星殞人沒蘭衰

周大將軍懷德公吳明徹墓誌銘

公諱明徹字通昭兗州秦郡人也西都列國長沙王功
被山河東京貴臣大司馬名高霄漢豈直西河有守智
足抗秦建平有城威能動晉而已也祖尚南譙太守父
標右軍將軍抗拒淮沂平夷濟漂代為名將見於斯矣
公志氣縱橫風情倜儻圮橋取履早見兵書竹林逢猿
徧知劍術故得勇爵登朝材官入選起家東宮司直後除

左軍葛瞻始嗣兵戈仍遭蜀滅陸機纔論功業卽值吳
亡公之仕梁未為達也自梁受終齊卿得政禮樂征伐
咸歸舜後是以威加四海德教諸侯蕭索烟雲光華日
月公以明畧佐時雄圖贊務鱗翼更張風飈遂遠冠軍
侯之用兵未必師古武安君之養士能得人心擬於其
倫公之謂矣為左衛將軍尋遷鎮軍丹陽尹北軍中堆
摠政六師河南京尹冠冕百郡文武是寄公無愧焉蕭
湘之役憑陵島嶼風船火艦周瑜有赤壁之兵蓋舳櫓

臚魏齊有橫江之戰仍為平南將軍開府儀同三司都督湘衡桂武四州刺史遂得左廣迴局轡車反暢長沙楚鐵更入兵欄洞浦藏犀還輸甲庫雖復戎歌屢凱軍幕猶張淮南望廷尉之囚合肥稱將軍之寇莫不失穴驚巢沉水陷火為使持節侍中司空車騎大將軍都督南北兗青譙五州諸軍事南兗州刺史南平郡開國公食邑八千戶鼓吹一部中台在玄武之宮上將列文昌之宿高蟬臨鬢吟鶯陪軒平陽之邑萬家臨淄之馬千

駟坐則玉案推食行則中分麾下生平若此功業是焉
既而金精氣壯師出有名石鼓聲高兵交可遠故得舳
艫所臨蓋於淮泗旌旗所襲奄有龜蒙魏將已奔猶書
馬陵之樹齊師其遁空望平陰之烏俄而南仲出車方
叔蒞止暢轍文茵鈎膺條草遂以天道在北南風不競
昔者裨將失律衛將軍於是待罪中軍爭濟荀桓子於
馬受戮心之憂矣胡以事君宣政元年屆於東都之亭
有詔釋其鸞鑣蠲其豐社始弘就館之禮即受登壇之

策拜持節大將軍懷德郡開國公邑二千戶歸平津之館時聞櫪馬之嘶舍廣城之傳裁見諸侯之客廡頗眷戀寧聞更用之期李廣盤桓無復前驅之望霸陵醉尉侵辱可知東陵故侯生平已矣大象二年七月二十八日氣疾增暴奄然賓館春秋七十七即以其年八月十九日寄瘞於京兆萬年縣之東郊詔贈某官謚某禮也江東八千子弟從項籍而不歸海島五百軍人為田橫而俱死焉嗚呼哀哉毛修之埋於塞表流落不存陸平

原敗於河橋死生慙恨反公孫之柩方且未期歸連尹
之尸竟知何日遊魂羈旅足傷溫序之心玄夜思歸終
有蘇韶之夢遂使廣平之里永滯冤魂汝南之亭長聞
夜哭嗚呼哀哉乃為銘曰

九河宅土三江貢職彼美中邦君之封殖負才矜智乘
危恃力浮磬戢鱗孤桐垂翼五兵早竭一鼓前衰移營
滅竈空幕禽飛羊皮詎贖畫馬何追荀瑩永去隨會無
歸存沒俄頃光陰愴悽岳裂中台星空上將眷言妻子

悠然亭障魂或可招喪何可望壯志沉淪雄圖埋沒西
隴足抵黃塵碎骨何處池臺誰家風月墳塋羈遠營魂
流寓霸岸無封平陵不樹壯士之隴將軍之墓何代何
年還成武庫

周大將軍上開府廣饒公鄭常墓誌銘

墓誌作鄭常九

百十九卷神道碑作
宇文常蓋其後賜也

公諱常字某滎陽人也周宣王之弟初封其國鄭穆公
之孫始成其姓祖思慶建威將軍山陽太守考頊儀同

三司豫州刺史南陽生嘯值此邦君西河建隼逢斯刺
舉公侯繼踵冠冕連鑣可得而言傳於史籍公髫髻知
禮早年馳譽就經黌舍畧見書堂習武兵欄偏知劒術
雖復年猶小學已為儒者所稱位在偏裨即入將軍之
賞大統三年起義華陽授本縣開國男文皇帝霸迹初
基英雄輻輳公拔劒轅門賴川從我洛城逆戰壯於白
馬之兵河橋解圍勇於烏林之策授平東將軍帥都督
襲父封魏後三年授持節車騎大將軍儀同三司車騎

用郭淮之勲儀同取王沉之貴公之此授僉曰得人進
爵廣饒縣公邑千戶保定三年授使持節都督遷州諸
軍事遷州刺史即摠領金州兵馬開拓北戎高山尋雲
深谷無景梯繩乃上浮竹裁通閩越影嚮勾吳聲勢公
出戰短兵並皆奔北瓦解冰碎山空谷靜授持節開府
儀同大將軍栢梁高宴有大將軍之詩幕府初開有平
陵侯之國比之今日豈可同年而語哉自是使車被之
繡服風謠是察刑政是觀公露節東驅風奔羣盜埋輪

當路威振中原武皇帝有盟津之師以公為中權之勁
外從決勝內侍軍謀及文軌既同旃旌已偃司勲行賞
軍吏舉功乃授使持節上開府增邑五百戶賜姓宇文
與國同乘之榮周之宗盟非復異姓之後藩屏是寄隆
寵所歸公室無踈此之謂矣九州都督須得其才千里
諸侯實俟其政乃為使持節都督東徐州諸軍事徐州
刺史尋遷南充州諸軍事南充州刺史公並摠六條再
勞十部俗變風移人懷吏畏滯穗遺秉有利疲人山桑

野蠶足充貢賦化被殊俗威行鄰境奏事京師四方第一
謂真刺史其在斯乎春秋未高奄然遘疾以大象元
年薨於州鎮時年六十三嗚呼哀哉吏人扳慕飛走變
色河濟輟春淮沂罷市以今年歸塋於滎陽之山詔贈
某官禮也嗟陵谷之貿遷懼徽猷之永遠地久天長敢
鐫貞石銘曰

荆河惟豫洛食之本水遶滎波山斜陸渾德星猶照祥
風未遠代不乏賢文無闕哀公之生也實降英靈忠為

德本孝亭天經觀書虎館學劍龍亭雕弓偃月行馬流
星置陣黎陽麾兵官渡平陰聽烏馬陵書樹氣視迴津
星占飛步火斷羌營沙崩賊路及驅犀節乃牧雄州吏
不驚犬人無喘牛西蠶得歲東作逢秋草爛獄戶星低
市樓五將星亡三台岳折哀哉天道遂當明哲棟梁崩
壞風雲寂滅北郭長悲東都永別幽深此地宅兆斯憑
山迴虎園路上魚陵悲風夜烈苦露晨凝蘭芬菊茂終

古相成

遷州神道碑作羅州按隋地里志西魏時于竹
山縣置羅州宇文後周于房陵縣置遷州至隋

并號

房州

周大將軍聞嘉公柳遐墓誌銘

聞嘉當作聞喜

君諱遐字子昇河東解縣人也秦始征晉之地漢開平越之鄉律中夷則星居鶉首况復莊謀於衛既為社稷之臣喜對於齊無廢諸侯之職祖叔珍宋員外散騎常侍義陽內史有徐邈之應對居於散騎之省有汲黯之正直理於淮陽之郡父季遠臨川王諮議叅軍宜都太守蘭臺石室是所洽聞白馬飛狐逾高詞氣西都吳融

擅名江表言談相會宛如舊焉君膺令德之靈稟冲天
之氣齟齬鬪髻髮夙智早成愛敬自天虔恭得性含仁抱
義履信居貞世父儀同忠惠公特加器異乃謂公曰吾
昔逮事伯父太尉公見語云我昨夢汝登一高樓樓盡
峻麗吾以坐席乞汝汝或富貴恨吾不及見耳吾向聊
復晝寢又夢將昔時坐席還復賜汝汝位官當復見及
王祥佩刀世為卿族鮑永驄馬家傳司隸以此連類差
無慙德輕車西昌侯作藩襄漢君時年十二以民禮脩

謁進止端詳神情雅正侯目送之不輟試遣左右踐君衣
裾欲視舉動君徐步稍前曾無顧盼魏侯之見劉廙不覺
欽容漢主之觀田鳳遂令題柱比之今日曾何足云驃騎
廬陵王帝子出藩懸衡高選以君華望召為主簿張坦直
諫既稱荀令之香鄒湛知言彌見羊公之德諮議府君于
都薨背君奔赴六日即屆京師形骸毀瘁不復可識靈柩
渡江中川薄晚亂流乘選迴風反帆舟中之人相視失色
抱棺號慟誓不求生俄爾之間風波即靜咸以君精誠所

致成都孝子自赴江流貴陽先賢身彰野火並存靈樞咸
可傷嗟太夫人乳間發瘡醫云惟得人吮膿血或望可差
君方寸已亂應聲即吮旬日之間遂得痊復君之事親
可謂至矣從兄右衛擁旌嶺表苦相携致昔馬遊志氣
為馬援所知班嗣才學為班彪見賞復聞於今日矣乃
除永化縣令靜除歌案或吟長岑之遠乍撫鳴琴不以
河陽為陋日南金柱合浦珠泉莫肯經懷未曾留目解
巾平西邵陵王法曹叅軍仍轉尚書工部郎始入禮闈

既登蘭閣尚書僕射陳郡謝舉人望國華引君言論謂
同位坐曰江漢英靈見於此矣西中郎岳陽王以綠車
之重臨西河之牧勅用君為本州治中尋遷別駕王叔
理以品物流名陳仲舉以題軒馳譽君之賢驥兼而有
之及乎大盜移國王室騷然月動星搖雲平虹直岳陽
王承制陝左當壁漢南天綱所頓英賢畢集授君散騎
侍郎吏部員外郎散騎常侍兼太子侍讀監儲甲觀事
重史丹侍講桂宮名高張禹俄遷車騎大將軍大都督

賜爵聞喜縣公侍中開府儀同三司餘如故方之驟乘
霍去病為侍中譬彼將兵公孫敖為驃騎足以照耀六
府謨明九德豈直允諧上將匡贊中軍而已哉既而言
從梁國服政鄴都管仲有詞即受下卿之禮臧孫見德
還奉嘉賓之宴有詔授使持節驃騎大將軍開府儀同
三司霍州諸軍事霍州刺史犀節去闕袞衣馳傳迎郊
則文學前驅賓衛則邦君負弩直以五溪遼遠馬伏波
之思歸三湘卑濕賈長沙之不顧是以宜城刺史直會

鹿門白沙故地仍留龍種天厲弗戒奄然終極天和五
年歸寔於襄陽白沙之舊塋君器宇詳正風鑒弘敏澡
身浴德游藝依仁汝南令望扶風長者不言財利王夷
甫之為德不談人物阮嗣宗之為人從容亂離之機保
此令德舒卷風雲之際無妨貴仕張衡渾儀之後即賦
歸田杜預沈碑已來遂停鄉里王仲宣有讀書之樓諸
葛亮有彈琴之宅實欲因此謝病閑居終焉鳴琴在膝
或對故人寶劍自隨時遇稚子百年俄頃嗚呼哀哉

遂使君子之陵止埋銅劍賢臣之墓唯銘石函銘曰
有莊有惠居魯居衛義是隨時才堪濟世北部尚書東
京司隸必復其始侯君相繼華蓋一岳文昌一星青衿
辨志童子離經義最非馬書勤映螢往年靈樞漂泊江
淹以君哀慟川后停波揚名北海馳譽西河誰登九折
不入朝歌蔚炳胥變攀陪遂遠白鹿隨軒丹翬附冕位
叅上將榮兼本選蛇盤綬結龜迴印轉來朝平樂歸政
咸陽蕃維即啓軍幕仍張起茲禮數峻此戎章長離宛

宛刷羽陵江世急奔流年催驚隼滅沒頓轡扶桑搖軫
智士石折賢人星隕西鄂芝枯南陽菊盡愴焉啓首生
榮終極相杵輟春鳴機罷織芄芄亂子視陰餘息霜露
履之哀哉藥棘龍巢北望鳳闕前觀松長風遠地厚泉
寒書埋簡落琴覆絃寬贈行之冊書而納棺

柳遐周書
作柳霞吳

融一作英融廬江周書
作廬陵啓首疑作啓手

故周大將軍義興公蕭公墓誌銘

昔司徒之敷五教當堯讓之初丞相之揔萬機值秦亡

之後若殷人受氏乃承微子之封梁運應圖實啓延陵
之國公諱太字世怡蘭陵人也太祖文皇帝之孫鄱陽
忠烈王之子派別天潢支分若木直幹自高澄源已遠
茂親明德是稱毛畢之功宗子維城乃建邢茅之國大
同元年年十六封豐城縣開國公食邑五百戶山臨鶴
塞非無陶侃之賓氣連斗牛即有張華之劔解褐給事
中仍太子洗馬公子出身非郎官而同品中朝洗馬異
式道而前驅以公居之誠為高選大同元年入直殿省

其年轉太子中書舍人南宮宿衛職司簡錡北閣崇班
榮叅顧問通籍兩宮得賢斯在大同三年授持節仁威
將軍譙州刺史褰帷祥氣之境刺舉消憂之地南陽風
俗文學更多美稷相迎童兒逾遠既而亂離漠矣王室
騷然大夫有行役之悲君子有無期之怨背闕懷楚扁
舟而行江漢奉當璧之君華夏歸中興之主承聖元年
拜侍中無雙對問實踵武於丁鴻多識舊章足齊衡於
王粲二年除持節平西將軍臨川內史仍轉平南將軍

桂陽內史尚方鑄劍再轉金龜御史分符雙封銅虎豈
直鄧攸清白見稱五鼓之歌劉寵廉能名為一錢之郡
遂以天保未定王途多梗還吳不可歸蜀無路臨淄負
海翻然改圖竄身清漳垂翅渤海蒙授車騎大將軍散
騎常侍仍為持節都督永州刺史而秦亭壓境邾折聞
城鼓角地鳴將軍天落雖復瓶缶聽聲無防於地道冠
繩柴疑結不却於雲梯請命受降翻歸都護周朝以楚
材晉用不停於平章趙璧秦求無論於羈遠以保定五

年除使持節驃騎大將軍開府儀同三司義興郡開國公食邑一千三百戶天和二年授使持節都督蔡州諸軍事蔡州刺史楚頃襄之愛子既布衣而戍谷魏安釐之母弟亦羈旅於邯鄲憂既傷人降年不永春秋五十有一薨於蔡州之鎮送故入關空餘袞服歸軒載道還更垂帷嗚呼哀哉有詔贈官謚禮也五年十一月葬於長安北原櫟里子之墳正臨武庫太史公之墓直對臯門銘曰

玄鳥遠烈相土弘謨東封宋社西歛秦圖人承佐漢國
紹開吳有美令德茂親藩邸建國皇支承家帝弟率由
冥會亮直天啓轅固聞詩唐都習禮博望之苑金華之
宮文林講德武帳叅戎名書柱上策滿帷中託身淄右
蒞政淮東秦亭西逼楚澤南窮時驚獵火或懼秋風屬
期遠畧逢茲應變陣橫十里兵圍一面月暈孤城塵驚
虛援春筍非糧秋蒿無箭垂翅卧龍夷衿輟戰時值懷
來恩加始賞王爵愈峻戎章更上朱鷺才飛虞歌即響

泣子留恨藏書長往炎涼迭運零落山丘霜芬幕月松

氣凌秋嗟南國之王子成東陵之故侯

諱太周書南史並作秦避周太

祖諱改中書舍人周書作太子中舍人南史止作中書舍人贈官周書作贈本官加并洛永三州刺史運一作送

故周大將軍趙公墓誌銘

公諱廣字乾歸邵惠公之元孫幽孝公之長子若水拂日長蛇委天龍圖幕河之光神鼎連雲之氣六辯構宇五運徵祥是以維嶽降神自天生德凝脂點漆日角珠

庭為子則名高五都為臣則光照千里華蓋中天之峰
未階其峻虞淵浴日之水不盡其源歲在珣車年方竹
馬月內桂樹切問能訓石上木生懸思即悟年十一孝
公薨芄芄在疚孺慕過禮泉驚孝水竹動寒林三行克
宣八翼斯舉大周建國宗子維城設壇封人分司典命
開國天水郡公食邑二千戶元年授使持節驃騎大將
軍開府儀同三司其年四月授都督秦州刺史孝公久
牧汧隴遺愛在人今茲見撫我君之子豈獨司隸之臺鮑

宣累葉丞相之府章賢重代二年拜大將軍方衛青之
張幕冊重元勲譬韓信之登壇榮高獨拜武成元年遷
都督興梁等十九州諸軍事梁州刺史嶠冢導漾乃濟
漢之東流蔡蒙旅平實華陽之西極其年九月改封蔡
國公食邑萬戶地接韓城關鄰楚鄣戶封八縣恩深寇
恂之功邑啓萬家事極曹參之賞保定元年授少司寇
犴戶苔生圖闕籥動載酒屬車幸無冤氣觀因軍府或
聽鳴琴二年轉守蒲城都督潼關等六防諸軍事其年

閏月遷都督秦渭等十二州諸軍事秦州刺史公亟牧
冀城頻藩隴坻豪傑歛手貪殘解印加以上谷精兵漁
陽噪鼓北臨高柳南望長榆匈奴下馬之山貴相藏酒
之谷莫不遠慕威聲遙承風化二年奉詔向甘州迎皇
后有文書手仲子之歸紀裂繻來卿為君逆自非名高
絕國威被和鄰豈得稱族而行尊君之命四年授柱國
大將軍昭陽以功高見用頃梁以名將當官以今方之
彼有慙德天和三年授都督虞陝等八州甘防諸軍事

陝州刺史屈產垂棘既有滅虢之兵王官羈馬非無絕
秦之路公以正正鼓旗閑閑車軌服叛威遠筭無遺策
但以中外久勞積斯災疾山川則並走羣望賓客則諸
侯在門是以請謁承明言歸湯沐方詢夏郊之祀或辯
桑林之祟更除秦州刺史仍襲父爵豳國公分流之嶺
未登晚塞之城空望太夫人以公羸疾相守悲泣胸氣
交衝奄捐館舍公頓伏苫寢水漿不入雖王人勸奪創
鉅愈增母死於子子死於親慈孝之道一朝摠集大漸

之辰春秋二十有九四闕罷市三軍行哭言尋聽訟猶
見寒棠還顧空營惟餘衰柳謚贈某官禮也六年六月
歸塋於秦州之某原玄甲啓路追旌驃騎之功龍旂贈
行深悼東平之遠公諒直惟忠溫恭惟孝居之仁義飾
以禮樂風神機警聰叡精明有仞於宮牆無形於喜愠
金版玉策之記枕籍忘疲蘭葉芝花之圖膏映必舉碣
石秋雲昭陽落月思風含臆言泉流吻翩翩書記則阮
瑤陳琳往往風流則王濛謝朓語其百發弓絕於猿吟

論其百中劔深於鴈陣枚乘之望梁苑不憚棄官樂毅
之求燕路無辭千里至如應變將畧雷電立成帷帳謀
猷孫吳閭合有品藻人倫之志有清平天下之心鵬路
忽催龍津遂壅嗚呼哀哉太宰早茂三荆長辭萬始撫
養遺孤連枝同氣馬援之戒兄子義存謹飭王沉之事
世叔情深愛敬同德比義此之謂乎乃為銘曰

御乾從紀乘離作聖白環讓德玄珪受命平一地紐增
輝天鏡傍廕數國前臨七政地屬先登時逢下武玉璜

撥亂金滕光輔衛晉承家邢茅昨土波分建木派流玄
扈景命寅序徽猷淵塞忠有令圖孝為全德山節涖政
桓珪守國瀚海將臨燕山行勒平樂高宴金華說經論
儒璧水親禮明庭相風待賦承露須銘乘舟向日策馬
隨星德舉克明能賢允淑上將授服元戎推轂趙失東
漁敵亡南牧箭下遼城泥封函谷袞衣頻露丹檐亟卷
約法情推繁辭理遣盜烏懸察疑蛇立辯人共官園家
同野繭繭雲推景轉風落仞星裂中台山傾左鎮夏楹

舍爵殷階啓殯緣幕躡行明
旂庭引秦川直望隴水分
飛山河滿目容衛靈歸陵
圖石馬車盡袞衣小山搖
落長林變衰悽愴原隰荒
涼宅兆樹密人稀山多路
小十里松城十年華表夜
臺尤寂窮泉無曉

後周文紀卷七

欽定四庫全書

後周文紀卷八

明 梅鼎祚 編

庾信

五

周譙國公夫人步陸孤氏墓誌銘

夫人諱字本姓陸吳郡人也大夫拓境百越來庭丞相
勒兵三江席卷高祖載為劉義真長史留鎮關中既沒
赫連因即仕魏臨終誠其子孫曰樂操土風不忘本也
言念爾祖無違此心祖政驃騎大將軍儀同三司恒州

刺史父通柱國大將軍大司馬文安公匡贊經綸叅謀
揖讓名高廣武功重長平夫人七德含章四星連曜敬
愛天情言容禮典九日登高作銘秋菊三元告始或誦
春椒年十有四聘於譙國友其琴瑟愈恭節儉之心伐
其條枚實秉憂勤之德鄴地登高之錦自濯江波平陽
採桑之津躬勞蠶月天和元年冊拜譙國夫人東武亭
之妻既稱有秩南城侯之婦還聞受封柱國殿下以名
華分照增城峻土揚旌棘道問政邛都白狼之溪途艱

黃牛之阪荔枝之山地險蒲萄之國夫人別離親戚闕
河重阻夷歌一曲未足消憂猿鳴三聲沾衣無已是以
天厲之疾遂成沉痾玉瀝難開金膏實遠建德元年七
月九日薨於成都私第春秋二十有一即以其年十一
月二十二日歸葬長安之北原詔贈譙國夫人禮也殿
下傷神秋月掩淚長松周季直之留書更深冥漠潘安
仁之詞藻徒增哀怨豈直西河女子獨見銀臺東海婦
人先逢金闕銘曰

艾陵反旆椒山止戈金精據嶺昌閣凌波西游卿相東
裂山河華亭冠冕穀水絃歌震維徙族燕垂從宦塞入
飛狐關連鳴鴈策預登阜功叅臨澗寶鼎留銘彫戈餘
贊應圖淑令秉禮言歸魚軒憑軾澤雉文衣明月照鏡
仙石支機行雲細起迴雪輕飛北降帝子南麾蜀守若
水既開靈山已鏤月峽猿啼江神牛鬪星機北轉日轡
星迴陽泉伏氣陰律沉灰鶴辭吳市鳳去秦臺神光離
合燈影徘徊雙流反莖百兩迴旌少女離位夫人去城

帷堂野設帳殿郊營山川奇事風月無情搖落丘隴荒涼封域樹樹秋聲山山寒色草短逾平松長轉直節墳

方固園陵永植

無已一作有感

周趙國公夫人紇豆陵氏墓誌銘

夫人諱含生本姓竇扶風平陵人魏其朝議列侯則莫能抗禮安豐奉圖功臣則咸推上席外戚列傳既聞建武之書仲山古鼎或表單于之獻祖畧少保建昌郡公父熾柱國大將軍太宗伯鄧國公孟津大誓常預同德

之臣咸陽違約克贊先登之主並得位入六府功叅八
柄夫人有文在手有象應圖榮曜夙彰徽華早茂肅恭
以禮受教於公宮言容以德有聞於師氏及乎進賢君
子內主邯鄲琴瑟在堂輜輶是服長久於節不無秋菊
之銘履端於始或有椒花之頌豈止莊姬掩笑楚相知
慙定姜問兆齊兵不入武成二年冊拜趙國公夫人漢
王聞立義之婦邑以延鄉齊侯見有禮之妻封之石窰
異代同榮差無慙德柱國殿下居若木之一枝在天漢

之別派揚旌玉壘驅傳銅陵南通向日之民東被無龍
之國夫人從政月峽贊德雲門濯錦江波還臨織室山
明石鏡即對粧樓既而玉律頻移金爐不變胡香四兩
嗟西域之使稀靈草一枝恨瓊田之路絕天和五年四
月二十二日薨於成都之錦城春秋二十孫子荆之傷
逝怨起秋風潘安仁之悼亡悲深長簟况復仙臺永別
無復簫聲傳母長歸唯留琴曲七年二月日歸塋於長
安之洪瀆原詔贈趙國夫人禮也雲雨去來既留連於

楚后光陰離合實惆悵于陳王銘曰

河西斗絕觀津孤起章武賢臣安豐賢仕木樓千仞金山萬里紹慶邢姨基昌宋子施衿趙北侍母秦南紘緹禮數厭狄駢驂義超江汜仁流葛覃玉筐迎鸛金籠助蠶敬愛純深端莊淑問有光國史無形喜愠舉案外恭停機下訓馨馥於蘭年華於薜風雨消散神靈離絕婺女還星姮娥歸月左楹夕奠高堂朝發空揚凌波更無迴雪下濕日隰高平日原西臨火井北望寒門猶垂雉

服尚駕魚軒平原忽矣天道何言山迴地市路沒滕城
松悲鶴去草亂螢生新雲別起舊月孤明賢墳永式節

隴常貞

一枝一作一株

周安昌公夫人鄭氏墓誌銘

夫人諱某滎陽陽武人也周宣王之母弟俾侯于鄭鄭
莊公之重世卿士於周以國為族自茲而始祖瓊太常
恭侯父穆司空貞公西京賦詩奉常參柏梁之宴東都
言讖司空為武衛之官籍連帝譜既同磐石門稱通德

無廢儒林夫人禮義閨門端莊令淑采采芣苢萋萋葛覃及乎作配君子言事舅姑下氣怡聲承巾奉帚親戚惟禮閨闈以睦保定二年冊拜滎陽郡君序戚升榮從夫有秩宜惟立義之婦邑以延鄉有禮之妻封之石窀大將軍沉犀二江夫人聞猿三峽明月靈關之阻秋風蜀道之難奄以瑤華先從春露天和十八年五月二十日薨于成都春秋三十六年詔贈安昌國夫人禮也即以其年十一月十六日歸葬于咸陽之白起原遂使山

迴反壤先封節婦之陵日入虞淵實掩賢姬之墓嗚呼
哀哉乃為銘曰

大河開國分畿置政地有十城人居九命疇昔之邑今
茲成姓識履傳風叅與留慶三星在戶百兩言歸虔恭
內政榮曜中闡承姑奉盥訓子停機桑園蠶績錦室鸞
飛珎璜節步藻火文衣巴水幽咽猿鳴斷絕月落珠傷
春枯桂折趙瑟長辭秦簫永別貞姬掩隧節女封墳洛
濱無月荆臺失雲鳥悲傷聽松聲愴聞千年遂古百代

餘芬

武衛一作玄武後漢王祐傳赤伏符曰王梁主衛作玄武武水神也司空水土官也立義一作德

周大將軍隴東郡公侯莫陳君夫人竇氏墓誌

銘

夫人諱某扶風平陵人也章武開國名高外戚之右安
豐入朝位在功臣之上祖以孝昌之始主諾淮陽父以
正光之初褰帷海岱夫人生於禮義之門宗於箴誡之
德虔恭惟禮令淑惟儀及乎百兩言歸三星在戶箴盟
始事條枚是則有子從政猶無逸豫之心有夫出征自

識山陵之兆大統十六年冊授永安郡君婦以夫尊親
由子貴朝章家慶兼而有之保定二年改授隴國夫人
車服禮數袿襦典則有美河魴足光彤史既而風霜所及
灰琯遂侵與善何言至于大漸天和六年四月七日薨
春秋六十有六即以其年十月十日遷葬于咸陽萬年
縣之杜原山形起伏既符白鶴之祥地勢風烟乃合青
鳥之氣銘曰

觀津世族平陵豪姓四侯登仕三君從政白狼建功丹

蛇襲慶漢之廣矣先聞淑令君子朝端賢才家政簪珥
以禮軒車以命讓果成廉推珠止競百年起忽千金莫
恃室謝賢夫庭辭貴子歸鞍輟露采繁廢祀室委眠蠶
衣畱畫雉雲垂下澤日掩高春空帷舊館虛幕新封山

迴廣柳路沒深松游魂幾變大人何從

朝章家慶一作成家之慶及一

作厲萬年一作石安考唐地理志咸陽無石安縣元氏誌作咸陽若安原

周冠軍公夫人烏石蘭氏墓誌銘

夫人諱某樂陵人也晉司徒樂陵公苞後子孫就封因

即家焉扶風舊城猶存鐵市河南故墅尚餘金谷或寓
燕陲仍仕代郡祖行代郡尹父魏司空蘭陵郡公司空
佐命魏朝少傅丞疑周室並為大族俱蒙賜姓秦晉匹
也是曰通家夫人年十七歸于宇文氏淑令端莊含章
貞吉箴盟惟儀閨闈已正某年除金鄉郡君某年改授
冠軍夫人四德小君宜其家室三事內主翻辭贊務以
保定五年四月遘疾薨時年四十有四即以其年某月
日歸葬于京兆之某原人世風煙山川超忽陵波青麥

儻逢貞女之墳隴首白楊或表賢姬之墓乃為銘曰
三星麗天五岳鎮地禮有其秩人居其位燕趙多奇山
川雄氣挺茲令淑惟此含章玉生庭照蘭開室香邢媛
聚服宋子河魴百兩言歸九儀從聘綸狄七彩軒車六
命鼎室辭親槐廷贊政世為閬水人成大夢迴帳山門
移燈泉洞金棗長含銀蠶永送香填栢柳路閉松城悲
鸞獨影雄劍孤鳴留連趙瑟悽愴秦笙

周太傅鄭國公夫人鄭氏墓誌銘

夫人諱某滎陽開封縣遠里人也七子賦詩足光賓客
三卿從政實靜諸侯驂乘則晉后停輿來朝則漢君識
履華胄蟬聯無虛史籍祖那秦州別駕父茂伯撫軍將
軍涼州刺史伯陽縣侯夫人令淑早聞芝蘭獨茂既容
既德言告言歸悌實溫清恭惟箴監太傅弼諧周室股
肱攸寄夫人輔佐君子勤勞是司琴瑟既友條枚無伐
故得用之邦國成之孝敬某年月日封鄭國夫人瑜狄
既加紘紼是務夫人有安世之貴躬服浣濯子有文伯

之尊無忘機杼表裏惟安閨闈且正醫門有疾藥對無
微天和三年三月二十日薨葬于長安之石安原世子
某兄弟並勛慈訓咸遵母儀霜露深悲寒泉增慟銘曰
居德圃田當官教府置騎賓來開黌學聚福履家室賢
才踵武棠棣之華螽斯之羽人倫七德風化二南采采
芣苢萋萋葛覃節行聲玉副笄珈簪柳園秉杼桑津浴
蠶春秋超忽零落無時家亡淑女國喪賢姬香墳永送
舞鶴長辭山深月闇風急松悲十年開閉將驗靈龜

一作副珈瑋
如無一作非

後魏驃騎將軍荊州刺史賀拔夫人元氏墓誌

銘

在河之洲聞君子之配德言采其蕝見夫人之有禮用
之風化人倫厚焉夫人諱安字大羅河南洛陽人也祖
某京兆康王父昭驃騎大將軍開府儀同三司錄尚書
司州牧汝陽郡王跗萼雄圖堦基霸迹公卿之室將相
維國維家夫人能修法度無思犯禮恭儉節用憂在進

賢大統五年封樂安公主歸於賀拔氏時年十三思事
憂勤化成婦德彤管載暉棠棣早茂及乎謳歌有歸榆
狄降等輔佐君子猶安其室周天和元年乃封章武郡
君霜露不居風烟飄忽遘疾累旬奄捐館舍以周天和
四年二月二十六日薨於長安萬年里春秋五十有二
詔贈頓丘國夫人禮也即以其年三月二十日歸葬於
咸陽之石安原既異乘鸞翻然永去雖非舞鶴即掩泉
門欲誌佳城乃為銘曰

逝矣雄謀悠哉霸轍九服潛運三川中竭卿相連鑣賢
才舞絕琬琰令淑施衿結褵方之棠棣譬以螽斯既全
婦德還稱母儀逝水滔滔危途冉冉問藥無對蒸丹不
驗狄服空陳絃機虛掩郭門路轉哀挽途窮隴深結霧
松高聚風春蘭秋菊唯始唯終

周大都督陽林伯長孫瑕夫人羅氏墓誌銘

夫人諱某恒州代郡太平縣人祖某父恒周大將軍南
陽郡公夫人資於事親躬奉訓誡教於宗室足聞詩禮

及乎言歸肅恭如事蘋藻維敬紘紼是勤內位克諧中
閨以睦年齡不競霜露先侵更無延壽之杯遂闕長生
之枕以周天和四年二月八日薨於長安之洪固鄉時
年二十有三其年某月日塋於萬年縣之壽里山非宋
國翻為節女之陵地異荆臺遂有賢妃之墓銘曰

畢狼建國靈武開都地接天柱山臨寶符人資義烈世
表雄圖葛覃維萋棠棣早盛既安淑德爰從配命四教
弘宣三星克正霜凋桂苑風落芝田三從闕性五福傷

年歸安永絕言告長捐悽切郊野紆迴隰原風慘雲愁
松悲露泣朗月空嗟傷神何及

周儀同松滋公拓拔競夫人尉遲氏墓誌銘

夫人諱某河南洛陽人也祖父太師柱國公魏室喪亂
經綸夷阻周朝建國匡翊揖讓圖讎帝系即有內外之
親分裂山河仍為舅甥之國夫人容範端莊儀型淑令
六義觀德南風有夫人之詩八卦成形東方有少女之
位外傳習言公宮教業箴盟線續佩悅蒞蘭年十有三

出適儀同拓拔競衣且翟服既得宗婦之儀乘其魚軒
還從列國之禮標梅三實無闕其時天桃九華能修其
政某年月日冊拜迴落縣君母金明公主魏文帝長女
春則帝女采桑秋則王姬築館夫人出入主家遨遊戚
里濯龍園苑長門宮殿既而膏腴美疚華茂傷年沉痼
牀帳蒸離寒暑三世之術無乏於醫門百草之本徒疑
窮於藥性建德三年五月七日亡春秋三十昔西河女
子值九節之菖蒲東海婦人得三山之芝草無由再遇

悲矣如何即以其年十一月十五日塋於京兆之北陵
原龜筮告辰丘陵啓奠西臨織女之廟南望湘妃之墳
嗚呼哀哉乃為銘曰

父曰帝師母曰王姬車服不繫江漢無思是生令淑觀
禮敦詩聲超宋子德茂邢姨繼世盛德思賢克舉奠鴈
迎門儒蘋實俎奉盥如事移茵即序春水浴蠶秋機秉
杼帝鄉近親帝城近臣濯龍親戚平陽主人金波迴月
玉樹臨春弄玉鳳凰昌容紫草自此千年無人得道舜

華榮曜飄零何早渭水北原平陵故園纔通谷口即望
寒門吁嗟此地去矣歸魂孟冬十月長松九年親賓掩

淚悽愴何言

美疾一作美疾乏
一作迨儒一作是

周驃騎大將軍開府儀同三司冠軍伯柴烈李

夫人墓誌銘

夫人諱某隴西狄道人也周有柱史夫子以之猶龍漢
有將軍宛城以之輸馬復有西入上書仍為秦國之相
東向問計即是韓王之師父宜使持節大將軍南北二

華州刺史順陽郡公魏武皇帝之長舅也穰侯魏冉居
咸陽之宮曲陽王根借明光之殿語其貴戚差足擬倫
論其退謙彼多慚德夫人幼而聰敏早聞令淑彤管有
美賢才見稱弄其紙筆懼失諸兄之意剪其髻齡畏傷
王母之心年十有一出適驃騎大將軍開府儀同三司
烈以上將領朔中台受任軍國忠勤規模繁摠夫人輔
佐君子言容匡贊增輝三星欽明四德授巾沃盥有謹
於事姑斷織停機無忘於訓子保定二年冊授大夏縣

君既以夫尊又云子貴乃遷順陽改郡君夫人之邑或用鄉名小君之號多從夫秩典冊光臨足稱榮寵本有風氣之疾頻年增動略多枕卧飛龜之散遣疾無徵畫龍之符留年不驗以今建德四年三月日薨於館舍春秋四十九即以其年八月日塋於長安之洪瀆原神光離合尚在河湄雲氣徘徊猶歸樓下嗚呼哀哉乃為銘曰

上書秦相立功漢將隴水分流秦川遙望秋陸俗勇金

行地壯廣武軍中安平河上妻者齊也謂嫁曰歸三星
夜照百兩朝飛榆狄有典容禮無違台庭等秩侯服同
衣子奉母儀夫聞家政七族承和九閨連慶紛悅恭肅
溫清孝敬杼棗秋成蠶隨春今年華未落電影先過徒
餐日氣空飲天河星凋玉井月捐金波虞淵落日薤露
哀歌寂寞虛奠荒涼象設幽隴龜封重泉蟻結秋色悽
愴松聲斷絕百年何幾歸於此別

周使持節大將軍廣化郡開國公丘乃敦崇傳

崇恒州代郡彭城縣廣義鄉孝讓里人也昔壽丘建國
賜姓者十二人平陽舉賢登朝者十六族况復大電繞
樞流星入昴派分源別幹其嗣興者乎魏道武皇帝以
命世雄圖飲馬河洛兄弟十人分為十姓辨風吹律丘
氏即其一焉五代祖邈驃騎大將軍開府儀同三司營
丘郡開國公於時天道西北既稟謀謨馬首東南實資
匡贊因以封名仍為賜氏與夫南公伯即有連類宗則
疑樂正非無準則曾祖雙軌使持節驃騎大將軍司徒

青兗二州刺史范陽文昭公洛食之始上馬治國登庸
之初昇槐論道生則絕席武宮死則配祠清室夫人太
原王氏三世為將四代為公社稷大宗鐘鼎貴族伉儷
是歸秦晉匹也祖提使持節衛將軍駙馬都督河交二
州刺史靈壽縣開國公公子公孫聲名籍甚增輝增耀
弱冠昇朝夫人清廉郡長公主孝文帝之第二女也王
姬有行車服不繫故得衛青上將張耳賢夫父願使持
節大都督徐州諸軍事徐州刺史平陽縣開國公食邑

四千戶少年習象多見兵書澆沙聚石之營却日橫雲
之陣彎弧則戟破小支抽劒則泉飛枯井夫人宇文氏
周文皇帝之第三妹也母儀令範女師賢哲德高隆慮
義重河陽魏受其終周新其命式墓封墳追旌盛德乃
贈使持節大將軍廣化郡開國公食邑一千戶夫人贈
安德郡長公主遊魂冤結非無廣漢之城久客思歸唯
有東平之樹自永安以來魏室大壞海水羣飛天星亂
動禮樂征伐不出於人主舉賢誅暴議在於彊臣高承

相驅率風雲奄荒齊晉我舅氏文皇帝駕馭龍虎據有
周秦南北渝盟東西敵怨既而各受圖書並當珪璧百
姓則父南子北兄東弟西事主則憂親求生則慮禍大
周親戚偏鍾茶炭輸之城旦下之織室闕河嚴隔三十
餘年天厭喪亂人思反德彼之風塵既靜函谷此之冠
蓋屢涉漳濱中山冤枉之餘代郡凋殘之澤並遇草音
咸蒙禮送崇賓兄弟二人相看氣息親愛凋零方寸久
亂恒山殺翮豈望同飛而安國徒中鬱為卿相班超絕

域遂得生還天和四年至於新邑朝廷以舅甥之國外
內之親乃授賓使持節驃騎大將軍開府儀同三司大
都督安樂縣開國公食邑一千戶賓得免虎口仍上龍
門聲價已高風焱即遠方欲討論國恥申雪家冤橫尸
原野是所甘心時不我與先從朝露春秋若干衛國興
文子之慟長安有詔塋之悲乃贈本官加少傅蒲虞勲
三州諸軍事蒲州刺史以天和六年某月日塋於長安
之洪瀆原妻青州石氏長城郡君亂子孤瑩生妻嫠室

即能有節還成守義崇蒙授使持節大都督驃騎大將
軍開府儀同三司廣化縣開國公食邑一千戶昆季二
人同年上將彤庭交映榮戟相臨昔二馮同德繼踵當
官兩杜齊名夾河為郡比斯榮寵彼將慙色俄然賓疾
奄捐館舍崇兄弟勝衣備罹禍酷同氣長養得及全人
今者來歸更憐凶閔每一悲慟行路傷心撫養愛子情
深馬援之慈恭事寡嫂義甚顏含之孝天和六年授大
將軍餘如故龍庭賞出塞之功玉門勞旋師之寵異代

同和見之今日建德二年授使持節都督宜州諸軍事
宜州刺史忽忽橫閭但有頌書曖曖重帷惟聞善政清
不置水明非舉燭乃是入境移風非直停車待雨有敕
大將軍宜州刺史廣化郡公崇自夏季無雨以迄於今
雖靡神不禱仍未降感知彼州內獨蒙滂澤諒由大將
軍精誠所至憂念郡人豐稔可希良以為慰又敕廣化
公崇知此存心政術治勤黎人受委稱職嘉尚無已古
人有言非行之難念加勉勗以致盡善指令宣納抑操

賜齊陳物如別宜諭朕懷昔陽平太守別降紅粟之恩
荊州刺史偏蒙袞衣之賜治績尤異此之謂乎崇清靜
為政廉明為法人不忍背吏不忍欺性不飲酒無所嗜
欲深沉墻仞喜愠不形文必正詞絃惟雅曲仁義禮節
是所用心緹袂紉素愛翫無已當今四郊多壘尚有公
卿之辱鼓輦不息猶勞將帥之謀語其讐恥唯願橫行
死地思其報國不吝身膏原野但今天假之年時綏之
福忠貞之事公其取焉畧書梗槩陳之直史

三月三日華林園馬射賦序

臣聞堯以仲春之月刻玉而遊河舜以甲子之朝披圖而巡洛夏后瑤臺之上或御二龍周王玄圃之前猶駢八駿我大周之創業也南正司天北正司地平九黎之亂定三危之罪雲紀御官鳥司從職皇上有秉歷之符玄珪有成功之瑞豈直天地合德日光華而已哉皇帝以上聖之姿膺下武之運通乾象之靈啓神明之德夷典秩宗見之三禮夢為樂正聞之九成克已備於禮

容威風摠於戎政加以卑宮菲食阜帳綿衣百姓為心
四海為念西郊不雨即動皇情東作未登彌迴天眷兵
草無會非有待於丹鳥宮觀不移故無勞於白鷺銀瓮
金船山車澤馬豈止竹簟兩草共垂甘露青赤三氣同
為景星雕題鑿齒識海水而來王鳥弋黃支驗東風而
受吏於時玄鳥司厯蒼龍御行羔獻冰開桐華萍生皇
帝幸於華林之園玉衡正而泰階平閭闔開而勾陳轉
千乘雷動萬騎雲屯落花與芝蓋同飛楊柳共春旗一

色乃命羣臣陳大射之禮雖行袞襖之飲即用春蒐之
儀止立行宮裁舒帳殿階無玉璧既異河間之碑戶不
金鋪殊非許昌之賦洞庭既張承雲乃奏騶虞九節狸
首七章正繪五彩之雲壺寧百福之酒唐弓九合冬幹
春膠夏箭三成青莖赤羽於是選朱汗之馬校黃金之
埒紅陽飛鵲紫燕晨風唐成公之驕驕海西侯之千里
莫不飲羽銜竿吟猿落鴈鐘鼓震地埃塵漲天酒以壘
行餽由鼎進彩則錦市俱移錢則銅山合徙太史聽鼓

而論功司馬張旃而賞獲上則雲布雨施下則山藏海
納實天下之至樂景福之歡欣者也既若木將低金波
欲上天顏惟穆賓歌惟醉雖復暫離北闕聊宴西城即
同鄴水之朝更是岐山之會小臣不舉奉詔為文以管
窺天以蠡測海盛德形容豈容梗槩

葦一作草玉
壁一作玉甃

哀江南賦序

粵以戊辰之年建亥之月大盜移國金陵瓦解余乃竄
身荒谷公私塗炭華陽奔命有去無歸中興道銷窮於

甲戌三日哭於都亭三年囚於別館天道周星物極不
反傳燮之但悲身世無處求生袁安之每念王室自然
流涕昔桓君山之志士杜元凱之平生並有著書咸能
自序潘岳之文彩始述家風陸機之詞賦先陳世德信
年始二毛即逢喪亂狼狽流離至於暮齒燕歌遠別悲
不自勝楚老相逢泣將何及畏南山之雨忽踐秦庭讓
東海之濱遂餐周粟下亭漂泊高橋羈旋楚歌非取樂
之方魯酒無忘憂之用追為此賦聊以記言不無危苦

之詞唯以悲哀為主日暮途遠人間何世將軍一去大
樹飄零壯士不還寒風蕭瑟荆壁晚柱受連城而見欺
載書橫階捧珠盤而不定鍾儀君子入就南冠之囚季
孫行人留守西河之館申包胥之頓地碎之以首蔡威
公之淚盡加之以血釣臺移柳非玉關之可望華亭鶴
唳豈河橋之可聞孫策以天下為三分衆纔一旅項籍
用江東之子弟人唯八千遂乃分裂山河宰割天下豈
有百萬義師一朝卷甲芟夷斬伐如草木焉江淮無涯

岸之阻亭壁無藩籬之固頭會箕歛者合從締交鋤耨
棘矜者因利乘便將非江表王氣終於三百年乎是知
併吞六合不免軹道之災混一車書無救平陽之禍嗚
呼山嶽崩頽既履危亡之運春秋迭代必有去故之悲
天意人事可以悽愴傷心者矣况復舟楫路窮星漢非
乘槎可上風飈道阻蓬萊無可到之期窮者欲達其言
勞者須歌其事陸士衡聞而撫掌是所甘心張平子見
而陋之固其宜矣

傷心賦序

余五福無徵三靈有譴至於繼嗣多從天拆二男一女
並得勝衣金陵喪亂相守亡歿羈旅關河倏然白首苗
而不秀頻有所悲一女成人長孫孩稚奄然玄壤何痛
如之既傷即事追悼前亡唯覺傷心遂以傷心為賦若
夫入室生先非復企及夾河為郡前途逾遠婕妤有自
傷之賦揚雄有哀祭之文王正長有北郭之悲謝安石
有東山之恨豈期然矣至若曹子建王仲宣傳長虞應

德璉劉韜之母任延之親書翰傷切文詞哀痛千悲萬恨何可勝言龍門之桐其枝已折卷施之草其心實傷嗚呼哀哉

趙國公集序

竊聞平陽擊石山谷為之調大禹吹筠風雲之為動與夫含吐性靈抑揚詞氣曲變陽春光迴白日豈得同年而語哉柱國趙國公發言為論下筆成章逸態橫生新情振起風雨爭飛魚龍各變方之珪璧塗山之會萬重

譬似雲霞赤城之巖千丈文參厯象即入天官之書韻
涉絲桐咸歸摠章之觀論其壯也則鵬起半天語其細
也則鷦巢蚊睫豈直熊熊旦上增城抱日月之光燄燄
宵飛南斗觸蛟龍之氣昔者屈原宋玉始於哀怨之深
蘓武李陵生於別離之世自魏建安之末晉太康以來
雕蟲篆刻其體三變人人自謂握靈蛇之珠抱荆山之
玉矣公斟酌雅頌諧和律呂若使言乖節目則曲臺不
顧聲止操縵則成均無取遂得棟梁文囿冠冕詞林大

雅扶輪小山承蓋

藝文類聚

擬連珠四十四首

蓋聞經天緯地之才拔山超海之力戰陣勇於風飈謀
謨出乎胸臆斬長鯨之鱗截飛虎之翼是以一怒而諸
侯懼安居而天下息

蓋聞蕭曹贊務雄畧所資魯衛前驅威風所假是以黃
池之會可以爭長諸侯鴻溝之盟可以中分天下

蓋聞解封豕之結塞長蛇之源必須製裳千里啗血轅

門是以開百里之圍用陳平之一策盟千乘之國須季路之一言

盖聞得賢斯在不藉揮鋒股肱良哉無論應變是以屈倪叅乘諸侯解方城之圍干木為臣天下無西河之戰

倪當
是完

盖聞邯鄲已危徒思馬服薊城去矣空用荆軻是以竹杖扶危不能止武擔之石蘆灰縮水不能救宣房之河盖聞蟻穴衝泉未知遠慮玄禽巢幕何能永久是以大

厦既焚不可灑之以淚長河一決不可障之以手

盖聞膏唇喋喋市井營營或以如簧自進或以狙詐相傾是以子貢使乎五都交亂張儀見用六國縱橫

盖聞謀猷是習權變須長時增齊竈或卧燕牆是以井陘之兵如鴻毛之遇火長平之卒若秋草之中霜

盖聞彼忝離離大夫有喪亂之感麥秀漸漸君子有去國之悲是以建章低昂不得猶瞻灞岸德陽淪沒非復能臨偃師

蓋聞市朝遷貿山川悠遠是以狐兔所處由來建始之
宮荆棘叅天昔日長洲之苑

蓋聞天方薦瘥喪亂弘多空思說劒徒聞枕戈是以劉
琨之英略莫知自免祖逖之慷慨裁能渡河

枕一作投

蓋聞穀林長送蒼梧不從唯桐唯葛無樹無封是以隋
珠日月無益驪山之火雀臺絃管空望西陵之松

蓋聞雷驚獸駭電激風驅陵歷闕塞枕跨江湖是以城
形月偃陣氣雲鋪非綠林之散卒即驪山之叛徒

蓋聞死別長城生離函谷遼東寡婦之悲代郡孀妻之
哭是以流慟所感還崩杞梁之城灑淚所需終變湘陵
之竹

蓋聞三世用兵既非貽厥陰謀累葉必以凶終是以李
都尉之風霜上蘭山而箭盡陸平原之意氣登河橋而
路窮

蓋聞營魂不反燐火宵飛時遭獵夜之兵或斃空亭之
鬼是以射聲營之風雨時有冤魂廣漢郡之陰寒偏多

夜哭

蓋聞江黃戎馬之徼鄢郢風飈之格乍有去而不歸或
無期而遠客是以章華之下必有思子之臺雲夢之傍
應多望夫之石

蓋聞無怨生離恩情中絕空思出水之蓮無復迴風之
雪是以樓中對酒而綠珠前去帳裏悲歌而虞姬永別
蓋聞樹彼司牧既懸百姓之命及乎厭世復傾天下之
心是以一馬之奔無一毛而不動一舟之覆無一物而

不沉

蓋聞嚴霜之零無所不肅長林之斃無所不標是以楚
塹既填遊魚無託吳宮已火歸燕何巢

蓋聞名高八俊傷於閹豎之黨智周三傑斃於婦女之
計是以洪澤之蛟遂挫長飢之虎平臯之蟻能摧失水
之龍

蓋聞吳艘蜀艇不能無水而浮以紅間綠不能無弦而
射是以籠樊之鶴寧有六翮之期翫雛之馬無復千金

之價

盖聞性靈屈折鬱抑不揚乍感無情或傷非類是以嗟
怨之水特結憤泉感哀之雲偏含愁氣

盖聞遷移白羽流徙房陵離家折里悽恨撫膺是以吳
起之去西河潸然出涕荆軻之別燕市悲不自勝

盖聞廉將軍之客館翟廷尉之高門盈虛倏忽貴賤何
論是以平生故人灌夫不去門下賓客任安獨存

盖聞執珪事楚博士留秦晉陽思歸之客臨淄羈旅之

臣是以親友會同不妨懷撫悽愴山河離異不妨風月
闕人

蓋聞五十之年壯情久歇憂能傷人故其哀矣是以譬
之交讓實半死而言生如彼梧桐雖殘生而猶死

蓋聞秋之為氣惆悵自憐耿恭之悲踈勒班超之念酒
泉是以韓非客秦避讒無路信陵在趙思歸有年

蓋聞懸鶉百結知命不憂十日一炊無時何耻是以素
王之業乃東門之貧民孤竹之君實西山之餓士

蓋聞胸中無學猶手中無錢今之學也未見能賢是以
扶風之高鳳無故棄麥中牟之甯越徒勞不眠

蓋聞十室之邑忠信在焉五步之內芬芳可錄是以日
南枯蚌猶含明月之珠龍門死樹尚抱咸池之曲

蓋聞百尺之高累於九磬之上千鈞之重懸於一木之
枝是以截虎尾而非險傷龍鱗而未危

蓋聞居蘭處鮑在其所習白羽素絲隨其所染是以金
性雖質處劒即凶水德雖平經風即險

盖聞豫章七年斃於豐草幽蘭九畹淪於幽谷是以欲
求其真晉陽有自理之蒿若賞其聲吳亭有已枯之竹
盖聞明鏡蒸食未為得所干將補履尤可傷嗟是以氣
足凌雲不應止官武騎才堪王佐不應直放長沙

盖聞勢之所歸威之所假必能繫風捕影暴虎馮河是
以輕則鴻毛沉水重則磐石凌波

盖聞意氣難干非資扛鼎風神自勇無待翹關是以曹
歲登壇汶陽之田遽反相如晚桂連城之壁更還

蓋聞卷施不死誰必有心甘蕉自長故知無節是以螺蚌得路恐異驪淵雀鼠同歸應非丹穴

蓋聞北邙之高魏君不能削穀洛之鬪周王不能改是以愚公何德遂荷鍤而移山精衛何禽欲銜石而塞海蓋聞君子無其道則不能有其財忘其貧則不能恥其食是以顏回瓢飲賢慶封之玉杯子思銀珮美虞公之垂棘

蓋聞水之激也實濁其源木之蠹也將拔其根是以延

年之家預論掃墓羊舌之族先知滅門

蓋聞磨礪唇吻脂膏齒牙臨風扇毒向影吹沙是以敬而遠之豺有五子吁可畏也鬼有一車

蓋聞虛舟不忤令德無虞忠信為琴瑟仁義為庖厨是以從莊生則萬物自細歸老氏則衆有皆無

蓋聞三關頓足長城垂翅既羈既旅非才非智是以烏江艤檝知無路可歸白鴈抱書定無家可寄

文苑
英華

後周文紀卷八